

2 Pita

Yän-yäkñarani äma täño man jopi yäpä-siwon takta manbiñam

¹ Man ñowä Saimon-Pita näkä kudän täyat. Näk Jesu Kristo täño watä epän äma ba aposoro kubä. Täñkañ ämawebe nadäkinik nintä yäpmäñ kuñat takamäñ udegän yäpmäñ kuñat takañ inta yäñpäñ man ño kudän täyat. Nadäkinik yäyat uwä nadäkinik Anutunin ba waki keriken nanik nimagurani Jesu Kristo unitäño taktäk siwonji terak yäpumäño u. Nadäkiniknin u imaka jopi nämo, unita iyap takinik täk takamäñ.

² ✧ Täñpäkañ Anutu ba Ekäninin Jesu Kristo unitäño manbiñam daniñpäñ yäñpäñ-nadäk täñ irirä unitäño orakoraki ba bänep pidämtä inken tokñek-inik pat tamik täyon.

Ninä Anututä inita iwoyäñpäñ nipmañkuk

³ ✧ Jesu Anutu ude itkañ kehäromini inipärik kubä unitä kehäromi nimiñ moreñirän irit kehäromita biñam itta, ba kudän Anututä ini gäripi nadäk täyak u täñpeñ kuñatta nadäk kädet ätuta wäyäkñenañi nämo. Ude kuñatneta mebärini käbop nämo peñkañ wäpi biñam peñyäñek ikek kwawak niwonäreñkuk. Uterak, ba ninta yäñpäñ epän säkgämän kubä täñkuko uterak inita biñam yäñpäbä nipmañkuk.

⁴ Ude täñkuko uwä imaka säkgämän-inik, gwäki ärowani nimikta yäñkehärom tañkuko u nimiñkuko

ubayäj. Täñirän iron uterak kome täño nadäj gärip ba kañgärip waki äma täño bänepi täñpänwak täkañ u täga irepmitpäñ bänep nadäk-nadäkjin Anutu täño ude bumik äworek täyak.

⁵ Mebäri unitagän kudän siwoñi mebäri mebäri yäpurärätpäñ yäpurärätpäñ täñpän kuñat täkot. Nadäkinikjin nitek itkañ kudän siwoñi pewä ahäwäpäñ kañ kuñarut. Täñkañ kudän siwoñi terak kuñatpäñ kudän siwoñi Anututä gäripi nadäk täyak unita yäñpäñ-nadäk täk täkot.

⁶ ✧ Ude täñkañ irit kuñat-kuñatjinta watäni itkañ bäräpi gänañ gwäk pimiñpäñ kuñat täkot. Ude täñkañ Anututä iniken kudän siwoñi u injtpäñ ini bumikgän kuñat täkot.

⁷ Ude täñpän notjiye kowat nadäj imän täñpän iron kädet bureni pewä ahäk täyon.

⁸ Kudän udewani koreñpäñ yäpmäj kuñatneñ. Yäpmäj kuñarirä tañi tokñenayäj täkañ uwä eruk nadäk Jesu Kristoken nanik yäpuño uwä jopi nämo api täñpek. Nämo, u irit kuñat-kuñatjinken bureni ahäj-bumbum api täneñ.

⁹ Täñ, äma kubätä kudän siwoñi udewani nämo yäpmäj kuñarayäj täko uwä Anututä kädet ude kañ iwarut yäj niwet täyak u nämo nadäwän tumbani yäj iwetne. U äma dapuri tumbani ba dapuri waki ude bumik. U momini biani ärutpak täwani unita guñ täyak.

¹⁰ Eruk notnaye, in äma udewani nämo äworeneñ. Nämo, Anututä inita biñam iwoyäñpäñ tämagutkuko unita gwäk pimiñpäñ iniken äbot itta epäni kehäromi täneñ. Ude tänayäj täño uyaku

✧ **1:6:** Gal 5:22-23

nadäkinikjin nämo pewä putärewäpäñ tänyabäk-ken nämo api mäneñ.

11 Kädet ude terak Anututä Ekäninin ba waki kerik-ken nanik nimagurani ämanin Jesu Kristo täño kañiwat yewani paot-paori nämo u gänañ ärokta api taniñ kirewek.

Anutu täño man u bureni

12 ✧ Notnaye, man u nadäkañ. Ba Anutu täño man buramiñpäñ yäpmäñ kuñat täkañ u bureni-inik yäñ nadäñpäñ kehäromigän inñit täkañ. Upäñkañ näk intä man u tängunñ takta gäripi nämo nadätat. Unita yäñpäñ kadäni kadäni pen api täwet täñpet.

13 ✧ Nöde kañ täñpa yäñ nadätat; Nämo kumäñkañ irayäñ täyat ude bänep nadäk-nadäkjin äneñi täñpidäm takta man u wari wari pen api täwet täñpet.

14 ✧ U imata, näkä kumäkta kadäni keräp täyak yäñ nadätat, Ekäninin Jesu Kristotä näwetkuko ude.

15 Unita näk inken täwetpäñ täwoñärek epän kehäromi täñpayäñ. Ude täñpayäñ täro uyaku kumäñirawä man täwetpäñ täwoñärek tak täyat u juku piñpäñ api yäpmäñ kuñatneñ.

16 ✧ In nadäkañ; Ekäninin Jesu Kristotä kehäromi nitek äbayäñ täyak unitäño manbiñam uku täwetpäñ täwoñärek täñ yäpmäñ äbumäño uwä äma täño kobap manpäñ nämo täwetkumäñ. Nämoinik, dapunintä Anutu täño wäpi biñam peñyänjek pähap ikek uterak ahäñirän bureni kañkumäño unita yäk täkamäñ.

✧ 1:12: Jud 5 ✧ 1:13: 2Pi 3:1 ✧ 1:14: 2Ko 5:1; Jon 21:18-19

✧ 1:16: Mat 17:1-5

17 ✧ Nin kaŋpäŋ nadäŋitna Anutu Nanintä oran imiŋpäŋ wäpi biŋam iniŋ oretkuk. Täŋkaŋ Anutu wäpi biŋam säkgämän-inik, inipärik kubä iranitä Jesu ŋode iwerirän nadäŋkumäŋ; Njowä nanakna bureni, näkŋaken bänepna gämäni-inik. Unita gäripi pähap nadäk täyat yäŋ yäŋkuk.

18 Man kotäk uwä, pom kudupi uterak iritna kunum gänaŋ naniktä äpäŋirän nadäŋkumäŋ.

19 Ude kaŋpäŋ nadäŋkumäŋo unita man profet bianitä yäŋahäwani unita nadäkinik bureni täk täkamäŋ. Unita in imaka, manbiŋam u juku peŋpäŋ nadäŋpäŋ yäpmäŋ kuŋarirä api tägawek. Profet täŋo man u topän täŋo peŋyänjektä bipmäŋ urani gänaŋ peŋyänjek täyak ude. Topäntä ijin yäpmäŋ kuŋtäyon kome yäŋek täyak udegän man unitä bänepjin-ken peŋyänjeŋ tamiŋ yäpmäŋ kuŋtäyon guk pähap wäpi abäyänjektä kaŋ ahäŋ tamän.

20 Täŋpäkaŋ ŋodeta nadäkinik täŋput; Imaka kämi ahäкта yäwani profet bianitä yäŋkuŋo u iniken nadäk terak nämo yäŋahäŋkuŋ. 21 ✧ Nämo, profet man biani kubä ämatä iniken nadäk terak kubä nämoinik ahäŋkuk. Nämo, Kudupi Munapiktä bänepi täŋpidäm taŋ yämiŋirän Anututä man yämani u yäŋahäŋkuŋ.

2

Yäŋ-yäkŋarani ämata man

1 ✧ Bian profet jopi ätu Isrel ämawebe bämopiken itkuŋo udegän in bämopjin-ken api ahäneŋ. Ahäŋkaŋ Anutu wäpi terak jop manman, nadäkinik täŋpäwak man, u käbop käbop bämopjin-ken api

✧ 1:17: Mat 17:5 ✧ 1:21: 2Ti 3:16, 1Pi 1:11 ✧ 2:1: Mat 24:11; Jud 4

yāḡahāntāḡ kunenḡ. Ba ugān nāmo, Ekāni ārowani suwanpāḡ yāmagutkuko unita imaka, māde api ut iminenḡ. Ude tānayāḡ tāḡo unita Anututā bārāḡek-inik api tāḡpān wanenḡ.

² Tāḡpākaḡ āma māyaptā unitāḡo kādet kuronḡ iwatpāḡ kudān āmatā nāmo tānaḡi u api tānenḡ. Tāḡirā āma nadākinik nāmo tāḡpanitā yabāḡpāḡ man bureni tāḡo kādet unita yāḡpāḡ-yabāḡ yāwat api tānenḡ.

³ ✧ Tāḡpākaḡ āma jopman yāwani unitā monenḡta yabāḡḡārip tāḡkaḡ Anutu wāpi terak kobap man mebāri mebāri yāḡ-tāḡḡarirā monenḡ api yāminenḡ. Ude tānayāḡ tākaḡ upāḡkaḡ yāpmāḡ daniwani āmatā manken yepmakta kādāni bian penḡ yāmiḡkuko unita itsāmāḡtak. Ba yāpmāḡ daniwani āmatā tāḡpāwak tāḡpayāḡ tāko u tāḡa nāmo api irepmitnenḡ.

⁴ ✧ Unita imaka bian ahāwani tāḡo manbiḡam ḡode tāwera nadāwut; Bian aḡero ātutā waki tāḡirā Anututā nāmo yabāḡ korenḡkuk. Nāmo, u geḡi waki, awaḡ bipmāḡ urani ḡānaḡ uken ureḡ tāḡpān āpmonḡpāpāḡ yen kehāromipāḡ pādāt tāḡpāḡ yepmanḡkuko kādāni pāhapta itsāmāḡkaḡ.

⁵ ✧ Ba udegān āma biani biani Anututa māde ut imiḡirā nāmo yabāḡ korenḡkuk. Nāmo, yāḡirān umetā tokātpāḡ kudup dāpuk. Tāḡkaḡ Noa, Anutu iḡamiken siwoḡi irit kādet tāḡo manbiḡam yāḡahāwani ukāt iniken tawaḡken nanik 7 ugānpāḡ tāḡkentāḡ yāmiḡpāḡ yepmanḡkuk.

⁶ ✧ Ba kubā pen ḡode; Anututā Sodom Gomora

✧ **2:3:** Rom 16:18, 1Te 2:5 ✧ **2:4:** Jud 6 ✧ **2:5:** Stt 6:1–7:24, 8:18, 2Pi 3:6 ✧ **2:6:** Stt 19:24; Jud 7

ämawebe yabäwän wawäpän yotpärare yarä ukät ämawebe kudup kädap pewän päñku pat ijiwäpän kädäkut äworenpeñ kuñkuñ. Ude täñkuko uwä ämawebe Anutu mäde ut imik täkañ unitä kañpäñ ñode nadäkta; Nintä terak udegän api ahäñ nimek.

7 ✧ Täñ, äma kubä wäpi Lot, Sodom uken itkuko ugänpän täñkentän imiñkuk. Lot, äma täga uwä ämawebetä kädet kábäñi-inik u täñirä yabänkañ nadän bäräp täñkuk.

8 Ini uwä äma täga upänkañ kepma kubäkubä ämawebe täño täktäki yäkyäki waki u yabänpäñ-nadänkañ bänepi siwoñi-ken ägekot pähap nadänkuk, ärowani kudän täk täñkuño unita.

9 ✧ Eruk unita ñode nadäwut; Ekänitä iniken kudupi ämawebeniye täñyabäk mebäri mebäri-ken nanik täga täñkentän yämiñpäñ yämagut täyak. Täñ, ämawebe waki kädet iwatta gäripi nadäk täkañ u yabän yäwat itak. Yabän yäwat ittängän kowata yäpmäk-yäpmäk kadäni-ken kowata api yämek.

10 ✧ Bureni, äma kañgärip ba nadän gärip waki täñpäñ kubökäret kädet ämatä nämo tänañi täk täkañ u, ba Anutu täño man iwatpäñ gämori-ken kuñatta bitnäc täkañ uwä kowata yäpmäk-yäpmäk kadäni-ken täga nämo api irepmitneñ. Nämoinik!

Äma uwä äma jop manman yäwani bämopjin-ken itkañ u. U iniken gupi yäpmän äronpäñ iniken gärip ugän iwat täkañ. Täñkañ imaka wäpi biñam ikek kunum gänañ irani u yänärok yäwetta umun kubä nämo täc täkañ.

11 ✧ Nadäkañ, añero, äma udewani yärepmit morenpän kehäromi nimek it täkañ upänkañ Ekäni

✧ 2:7: Stt 19:1-16 ✧ 2:9: 1Ko 10:13; Jud 6 ✧ 2:10: Jud 7-8,16

✧ 2:11: Jud 9

injamiken itkaŋ jop manman terak nämoinik yäniŋ wärät täkaŋ.

12 ✧ U kawut! Profet jopi uwä imaka nämo nadäwä tärek täkaŋ unita man waki bumta yäk täkaŋ. U tom ägwäri bumik, nadäk-nadäki nämo. Tom ude, iniken gup täŋo gärip ugän iwaräntäk täkaŋ. Tom ämatä yabänpäŋ däpmäkta yäwani udegän äma uwä paotta biŋam täkta yäwani.

13 ✧ Uwä äma ätuta komi yämik täkaŋ kowata komi udegän api yäpneŋ. Imaka unita gäripi nadäk täkaŋ uwä käbop nämo peŋkaŋ kepma käroŋ gäripini däpmäŋ tärekta kudän waki mebäri mebäri wari wari täk täkaŋ. Ba inkät ketem bok täŋnak täkaŋ unitä äŋnak-äŋnakjin uwä täŋpewä imaka käbäŋ täwani taräki ude äworek täkaŋ. Ude täŋpäŋ oretoret täk täkaŋ.

14 Täŋpäŋ ugän nämo. U webe yabäŋgärip täŋpäŋ yäwarän täktagän nadäk täkaŋ. Momi täkta gäripi nadäk täkaŋ, u däpmäŋ tärenaŋi nämo. Ude täŋkaŋ ämawebe nadäkiniki kehäromi nämo ude-wani täŋyäkŋat-pewä momi täk täkaŋ. Täŋkaŋ äma ätuta nämo nadäk täkaŋ. Nämoinik, initagän nadäkinik täŋpäŋ iniken gärip däpmäŋ tärektagän nadäŋpeŋ kuŋat täkaŋ. Unita Anututä api däpmäŋ morewek.

15 ✧ Kädet siwoŋita mäde ut imiŋpäŋ täŋguŋguŋ täŋtäŋ kuŋat täkaŋ. Uwä Beo täŋo nanaki wäpi Balam unitäŋo kädet kuroŋ iwat täkaŋ. Balam uwä monenŋta yäŋpäŋ kädet waki täkta gäripi nadäŋkuk.

16 ✧ Ude täŋtäŋ kuŋtäyon doŋki, man nämo yäk täkaŋ upäŋkaŋ doŋki kubätä ämatä-yäŋ man

iwetpän Balam node kaŋ-yänkuk; ‘Tänğunğun kädet täk täyan u kaŋ pe! yäk.’

17 ✧ Tänpäkaŋ profet jopi uwä ume dapuri kawuk täwani udewani. Ba gubam mänittä piän äreyän tänpän jopjop kuk täkaŋ udewani. U täŋkentäk kubä täga nämo täneŋ. Unita äma udewanita Anututä yotpärare bipmäŋ urani wakiinik kubä peŋ yämiŋkuko uken api itneŋ.

18 ✧ U gup yäpmäŋ ärokärok man bumta yäntän kuŋat täkaŋ. Täŋkaŋ äbot tänpäni guŋ äbot täno täktäk kädet waki apigän pewanipän tänyäkŋat-pewä gup täno kaŋgärip kädet mebäri mebäri äneŋi iwat täkaŋ.

19 ✧ U bänep ärik-ärik man node yäwet täkaŋ; Nin niwarän tänyäŋ täno uyaku säkgämän-inik api itneŋ. Ude yäk täkaŋ upänkaŋ iniwä säkgämän nämo it täkaŋ. Nämo, u imaka tänpäwak ikek unita watä epän täŋ imik täkaŋ. Unita node nadäwut; Imaka kubätä intäjukun täŋ gameko uwä, gäk unitäŋo watä epän ämani jopi ude iren.

20 ✧ Unita äma udewanita node yäwa nadäwut; Bian äma uwä waki keriken nanik nimagurani Ekäninin Jesu Kristo unita nadäŋ imikinik täjirä Jesutä täŋkentän yämiŋpäŋ kome terak waki täktäk kädet kudup yärepmit moreŋkuŋ. Yärepmit moreŋkuŋo upänkaŋ äneŋi äyänutpeŋ kädet wakiken irirä unitä topmäŋpäŋ yepmäŋitkuk. Eruk äma udewani uwä wakiken bian itkuŋo u irepmitpäŋ wakiinik-inik-ken itkaŋ.

21 ✧ Unita kowata wakiinik yäpmäkta biŋam.

✧ 2:17: Jud 12:13 ✧ 2:18: Jud 16 ✧ 2:19: Jon 8:34 ✧ 2:20: Mat 12:45 ✧ 2:21: Luk 12:47-48

Pengän Jesu täjo kädet siwoņita nämo nadäwä tumbuņ yäwänäku täga bumik itkäneņ. Upäņkaņ uwä kädet siwoņita nadäwä tumbuņopäņ äneņi äyänutpeņ man kudupi yäwetpäņ yäwoņärewani u mäde ut imiņkuņo unita kowata wakitä wakiinik api yäpneņ.

²² ✧ Kädet u täņkuņo unita man kubä ṅode kudän täwani u bureni täyak; Aņtä aņek aņeņpäņ peņkaņ äneņi nak täkaņ. Ba kubä pen ṅode; But kubä ume ärut imiņpäņ pewäkaņ äneņi kumaņ päņku okä näbä gänaņ dumäk täkaņ.

3

Jesu bureni-inik api äbek

¹ ✧ Notnaye tägagämän, bänepjin-ken nadäk siwoņi pewä ahäkta man kudän intäjukun kudän täņ tamiņkuro ukät kubä ṅo man bian nadäwani u äneņi yänkodak taņpäņ täwetat.

² ✧ Imaka kämi ahänayäņ täkaņ profet kudupi bianitä yäwani unita äneņi juku piwut yänpäņ täwetat. Ba jukuman waki keriken nimagurani Ekäninintä aposoro meni-ken yänahäņ tamiņkuko unita guņ täneņ yänpäņ man ṅo täwetat.

³⁻⁴ ✧✧ Täņpäkaņ imaka taņi intä nadänaņi u ṅode; Tärektärekađani keräp taņiraņ ämatä iniken gärip iwatpäņ sära man ṅode api yäneņ; Äbäkta yänkuko u bureni de? Äbek oratä irä wawäpäņ kumbuņken unitä päbä apiņo itkamäņ-ken imaka imaka kunum kenta kome ahänpäņ iriraņ itkuņo udegän itkaņ ṅo yäk. Nämo api äbek! yän api yäneņ.

✧ **2:22:** Snd 26:11 ✧ **3:1:** 2Pi 1:13 ✧ **3:2:** Jud 17 ✧ **3:3-4:** 1Ti 4:1; Jud 18 ✧ **3:3-4:** Ais 5:19; Ese 12:22; Mat 24:48

5 ✧ Ude yäk täkaŋ uwä imaka bian ahänkuŋo unita guŋ taŋpäŋ ukeŋode yäŋ yäk täkaŋ. Upänkaŋ bian imaka inidegän nämo itküŋ. Anutu täŋo meni jinom terak kunum kenta kome ahänkumän. Täŋkaŋ Anututä yänpewän kometä ume gänaŋ nanik kwawak abänpäŋ ume bämopi-ken itkuk.

6 ✧ Täŋkukopäŋ mäden Anututä ini äneŋi yänirän ume tokneŋpäŋ kome biani u kudup peŋ awähutkuk.

7 Eruk apiŋo kunum kenta kome udegän Anututä yänirän itkamän. U jop nämo itkamän, u kädäptä ijiŋ paotta biŋam itkamän. Yäpmäŋ danik-danik kadäni-ken kunum kenta kome-kät ämawebe Anututa mäde ut imik täkaŋ u kudup api paot moreneŋ.

8 ✧ Unita notnaye tägagämän, imaka ŋodeta nämo guŋ täneŋ; Ekänitä kadäni nämo danik täyak. Unitäŋo nadäk-nadäkken kepma kubä uwä obaŋ 1,000 ude bumik. Täŋpäkaŋ obaŋ 1,000 uwä kepma kubä ude.

9 ✧ Kadäni nämo danik täyak unita ŋode yänaŋi nämo; Api äbek yäŋ yänkukopäŋ bäräneŋ nämo äbätak. Eruk bäräneŋ nämo äbätak uwä mebäri ŋodeta; Ekänitä äma ba webe kubätä paot-paotta biŋam täkta gäripi nämo nadätak. Kuduptagän bänepi äyänutpäŋ näkken äbut yänpäŋ nadäŋ tamänkaŋ kwikinik itsämänhtak.

10 ✧ Upänkaŋ Ekäni täŋo Kadäni u, iwantä äbäk täkaŋ ude, pit kubägän api ahäwek. Täŋirän kunum mämä yänawat pit kubägän api paorek. Ba imaka imakani u gänaŋ itkaŋ u kädäptä api ijiŋ morewek.

✧ 3:5: Stt 1:6-9 ✧ 3:6: Stt 7:11-21, 2Pi 2:5 ✧ 3:8: Sam 90:4

✧ 3:9: Hab 2:3, 1Ti 2:4 ✧ 3:10: 1Te 5:2; Mat 24:29,35

Täñkañ kome ini ba imaka imakani u terak itkañ u kudup udegän api paotneñ.

11 Kädet ude terak imaka päke u kudup api paotneño unita in irit kuñat-kuñat kädet jidewani upäñ iwatneñ? Uwä ñode; Inäwä irit kuñat-kuñatjin kudup Anututa imiñ moreñpäñ kädet siwoñi, Anututä iniken ugänpäñ iwat təkot.

12 ✧ Kädet ude kuñatkañ Anutu täño kadäni pähaptä bäräneñ ahäwän yänkañ dapun käron täñpäñ itsämänkot. Nadäkañ, kadäni ugän kunum api ijiñ paorek ba imaka imaka kunum terak itkañ u kudup api mutneñ.

13 ✧ Upänkañ ninäwä imaka Anututä nimikta yänkehäromtak man yänkuko unita itsämänkamäñ. Uwä kunum kenta kome kodaki, irit kuñat-kuñat kädet siwoñitä tokneñ pärekta yäwani u.

Ket nadänpäñ Ekänita itsämänkäna

14 Eruk notnaye, kadäni pähap unita itsämänjit itsämänjit Anutu inamiken momi nämo, siwoñi kuñatta gwäk pimiñpäñ kuñat təkot. Täñkañ Anutukät bänep kubägän itpäñ kuñatta epäni tək təkot.

15 ✧ Unita ket nadäwut; Anututä ämawebe bänepi äyänutpäñ inita biñam təkta unita yänpäñ itsämänktak. Man u kudupi nämo. Anututä notninpak Polta man kädet u imiñirän yänpäñ kudän täñpäñ tamiñkuko u udegän.

16 Poltä manbiñam kubäkubä kudän tək täyak uwä man u nikekgän. Bureni, Pol täño manbiñam ätu mebäri nadäna tumäkta pipiri tək təkamäñ. Unita äma ätu bänep nadäk-nadäk kubägän nämo

✧ 3:12: Ais 34:4 ✧ 3:13: Ais 65:17; Ais 66:22; Rev 21:1,27

✧ 3:15: Rom 2:4, 2Pi 3:9

inirani, ba Anutu täño man burenita nämö nadäwä tumbanitä Pol täño man ätu yäpmän äyänutpäñ goret yänahäk täkañ, ba Anutu täño man ätuta täk täkañ udegän. Ude täk täkañ uwä paotta biñam.

17 ☆ Upänkañ notnaye, kudän udewani kämi api ahäwek yän uku nadäk täkañ unita injinta ket nadänpän kuñat täkot. Täñyäkñarani äma, Anutu täño man tänpäwawani unitä täñ-täkñarani tänpän man jopi täwerirä nadäkinikjin kehäromi u pewä putärewäpäñ säkgämän itkañ u irepmitpäñ wakiken äpmonenña!

18 ☆ Tänpäkañ Jesu Kristo u Ekäninin ba waki keriken nanik nimagurani. Unitä orakoraki tamik täyak unitäño mebäri, ba iniken täktäkita yänpäñ-nadäk tänpän nadäwä tumbäpäñ kehäromigän kañ irut. Tänpäkañ wäp biñam ärowani, penyänjek ikek ba iniñoret man kudup Jesu Kristoken tärek-täreki nämö it yäpmän kuk täyon. U bureni!

Tuma-Irumu
The New Testament and portions of the Old Testament
in the Tuma-Irumu Language of Papua New Guinea
Nupela Testamen na sampela Olpela Testamen long
long tokples Tuma-Irumu long Niugini

copyright © 1997, 2011 Wycliffe Bible Translators, Inc.

Language: Tuma-Irumu

Translation by: Wycliffe Bible Translators

Contributor: Wycliffe Bible Translators, Inc.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-05-03

PDF generated using Haiola and XeLaTeX on 3 May 2025 from source files dated 3 May 2025

914cbf46-f59a-54d1-b209-0f763534edb5